



KENYATAAN MEDIA

INDRASUTRA UniMAP BUKAN SEKADAR HIBURAN

Arau - Muzik dan tarian sering disalah tafsir oleh masyarakat sebagai satu bentuk hiburan yang melalaikan tanpa mengambil kira sumbangan yang mampu diberikan jika kena dengan caranya.

Berlainan dengan Universiti Malaysia Perlis (UniMAP) yang meletakkan kepercayaan bahawa hiburan jika kena pada tempatnya mampu membantu malah memberikan kebaikan kepada orang lain.

Ini terbukti apabila kumpulan seni persembahan UniMAP iaitu Indrasutra di bawah Unit Kebudayaan dan Rekreasi (UKR) terpanggil menggunakan muzik dan tarian mereka untuk beramal mendapatkan dana bagi membantu pertubuhan anak-anak autisme.

Memilih pulau pelancongan Pulau Langkawi sebagai destinasi serampang dua mata, UKR seramai 39 orang membelah lautan Kuala Perlis pada Jumaat di bulan April bagi merealisasikan Program Tanggungjawab Sosial Universiti (USR) bagi pemuliharaan alam sekitar dan Busking Amal selama tiga hari.

Menurut Pengarah program yang juga Pengarah UKR, Izwan Izhar Haris pelaksanaan program ini adalah sebagai salah satu bentuk sumbangan bantuan kepada masyarakat.

“Kita ingin menjaga kebersihan Pulau Langkawi terutamanya Pantai Cenang yang menjadi tarikan dan tumpuan pelancong dari dalam dan luar Negara setiap kali tiba musim percutian.

“Oleh itu pelaksanaan pemuliharaan alam sekitar adalah penting bagi memberikan gambaran positif mengenai penjagaan alam sekitar oleh masyarakat Malaysia,” katanya ketika dihubungi pemberita baru-baru ini.

Mengambil inisiatif dengan kebanjiran pelancong ke Pulau Langkawi, UKR juga turut menjalankan kerja amalnya dengan mengadakan ‘Amal Busking’ ditempat tumpuan orang ramai bagi mengutip dana untuk disalurkan ke tabung A-Heart UniMAP iaitu sebuah badan yang memberi fokus kepada Autisme.

“Kami memilih beberapa lokasi strategik seperti di Cenang Mall dan Jeti Langkawi bagi mengadakan persembahan busking.

“Selain busking kami juga bertindak sebagai penyalur maklumat mengenai Autisme kepada orang ramai dan melalui penerangan yang diberikan kami berjaya mengutip sumbangan berjumlah RM 1500 dari pengunjung,” katanya.

Tambah Izwan lagi, wang kutipan tersebut diserahkan terus kepada tabung A-Heart UniMAP bagi membantu anak-anak autism di kawasan utara Malaysia.

“Saya percaya hasil penerangan kami mengenai Autisme, masyarakat akan lebih memahami apa itu autism dan kesedaran mengenai perlakuan dan sensitiviti anak autisme dan keluarga mereka.

“Kami gembira kerana berjaya merealisasikan program ini dan merancang untuk mengadakan lebih banyak aktiviti kemasyarakatan demi membantu mereka yang lebih memerlukan,” katanya.

Selain Busking Amal Autism, Indrasutra telah melibatkan diri dalam pelbagai aktiviti kemasyarakatan seperti mengadakan busking bagi kutipan amal Tabung Rohingya; memberikan sumbangan kepada pengiat seni Perlis semasa aktiviti Jelajah Sahur; menghiburkan anak yatim; pembersihan pantai; berkongsi ilmu muzik dan tari bersama kanak-kanak di Taska Pewaris UniMAP.

Tidak cukup dengan itu, mereka juga turut bersama-sama komuniti Islam di Satun dan Hatyai bagi khidmat gotong royong membersihkan masjid dan juga kelas agama.

Indrasutra UniMAP ditubuhkan pada 1 Mac 2005 adalah sebuah kumpulan seni persembahan khusus bagi UniMAP. Namun dek kecemerlangan yang ditunjukkan, mereka sering mendapat undangan bagi menjayakan majlis luar.

Izwan ketika ditanya asal usul nama Indrasutra lantas berkongsi bahawa ia adalah idea Pengarah UKR yang pertama iaitu Prof. Madya Dr Salmah Haji Ayob yang menggabungkan elemen nama “Indra” yang berkaitan dengan nama Negeri Perlis ketika itu (Perlis Indra Kayangan) dan juga “Sutera” yang sinonim dengan kelembutan rakyat Perlis dari segi perwatakan, tutur cara dan norma budaya yang melambangkan identiti Negeri Perlis.

“Di peringkat permulaan penubuhan “Indrasutra”, ahli-ahlinya perlu melalui proses temuduga dan ujibakat serta melepassi “standard” yang ditetapkan sebelum diterima dan diserapkan ke Unit Kebudayaan dan Rekreasi. Kebanyakkan mereka adalah dari kalangan yang berpengalaman dalam bidang masing-masing.

“Manakala Artis Budaya pula yang mempunyai pengalaman berkhidmat dengan badan-badan kesenian dan kebudayaan di Malaysia mula menyertai UKR pada sekitar tahun 2005 dan lengkap sepenuhnya pada 2006 lebih kurang 5 pasangan atau 10 orang,” katanya.

Indrasutra bukan sahaja terkenal di sekitar Perlis dan Malaysia tetapi telah membawa nama UniMAP dan Malaysia hingga keluar Negara.

“Indrasutra telah mewakili Negara bagi membuat persembahan kebudayaan di beberapa Negara setiap tahun bermula 2009 di Uzbekistan; Australia (2010); Korea Selatan (2011); China (2012); Italy (2013); UAE (2014).

Malah Negara Indonesia dan Thailand seakan rumah ke dua Indrasutra apabila kami berpeluang mengadakan persembahan di Negara tersebut saban tahun,” katanya.

Dikeluarkan Oleh :

Nurul Aida Othman (aidaothman@unimap.edu.my)

Penolong Pegawai Perhubungan Media UniMAP

Tel : 04-9798522 / 012-2210095